



Cuira, ils 29 d'october 2022

Communicaziun a las medias

## Radunanza da delegadas e delegads da la Lia Rumantscha a Donat

Sonda, ils 29 d'october 2022, ha gi lieu a Donat la radunanza da delegadas e delegads da la Lia Rumantscha – l'emprima giada sut il presidi da las co-presidentas Urezza Famos e Gianna Luzio. En il center da la radunanza è stada la strategia e la visiun da la Lia Rumantscha – sut l'ensaina da la transfurmaziun digitala.

Sonda, ils 29 d'october 2022 èn 42 delegadas e delegads e numerus giasts stads preschents a la radunanza da la Lia Rumantscha a Donat. Ella ha gi lieu en preschientscha dal cusseglier guvernativ Jon Domenic Parolini e da Marco Dolf, il president communal dal vaschinadi Muntogna da Schons. Il bainvegni musical han fatg las scolaras ed ils scolars da la scola da Donat.

### Pled da las co-presidentas da la Lia Rumantscha

Suenter avair manà discurs cun diversas persunas-clav internas ed externas da la Lia Rumantscha ils ultims mais han las co-presidentas Urezza Famos e Gianna Luzio preschentà a la radunanza da delegadas e delegads lur vista da la Lia Rumantscha dal futur. In grond tema ed in accent principal è stada la transfurmaziun digitala. «La finamira per ils proxims dus onns è da sviluppar e transfurmar la Lia Rumantscha ed uschia preparar ella per il futur», manegian Urezza Famos e Gianna Luzio. Per pudair realisar questa via ston tenor il co-presidi però vegnir unidas las forzas per il rumantsch ed adattadas las structuradas: «Unir las forzas vul dir per nus e la suprastanza da la Lia Rumantscha: (re)ponderar e sviluppar las structuradas da la Lia Rumantscha.»

Grazia a la transfurmaziun digitala, novas cuminanzas rumantschas en plirs chantuns, ina nova furma da communicaziun, cun il project «Rumantsch è...» e bleras autras activitads duess la Lia Rumantscha lura finalmain survegnir ina pli gronda visibilitad ed uschia vegnir percepida en tut la Svizra.

### Elecziuns

La radunanza da delegadas e delegads da la Lia Rumantscha ha elegì unanimamain Toni Vinzens da la Surselva Romantscha sco suppleant da la suprastanza da la Lia Rumantscha. El succeda ad Alberto Palaia, l'antier president da la Surselva Romantscha.

Mutaziuns hai era dà en la cumissiun da gestiun: quella sa cumpona davent dal 2023 da Fabian Augustin, Curdin Mayer e nov da Flurina Cantieni. Ella succeda a Sascha Janutin che ha declerà sia demissiun. Marcus Beer resta suppleant da la cumissiun da gestiun.

### Activitads e preventiv 2023

Ulteriuras tractandas da la radunanza da delegadas e delegads da la Lia Rumantscha èn stadas las activitads ed il preventiv per l'onn 2023. Ils accents da l'onn 2023 cumpiglian tranter auter il rinforzament da las cuminanzas en la diaspora, il program da famiglia, la digitalisaziun en il sector da furmaziun e



## Lia Rumantscha

lingua sco era la sensibilisaziun per il diever dal rumantsch en ils territoris rumantschs. Plinavant è en preparaziun ina nova pagina d'internet ed ina nova preschientscha sin las raits socialas. En connex cun il giubileum dad 85 onns rumantsch sco lingua naziunala il 2023 vul la Lia Rumantscha rinforzar la preschientscha dal rumantsch sin champ naziunal. In ulteriur tema impurtant vegn ad esser la transformaziun digitala. En collavuraziun cun differents partenaris vul la Lia Rumantscha realisar ina strategia digitala rumantscha. Per pudair inizialisar in prestudi en quest connex è vegnì preventivà per l'onn 2023 in credit spezial da 100'000.- francs. Plinavant ha la Lia Rumantscha publitgà duas plazzas per pudair sa deditgar a differents aspects da la digitalisaziun.

### Varia

Vincent Augustin, president da la SRG SSR Svizra Rumantscha (SRG.R), ha fatg attent a l'iniziativa «200 francs bastan! (Iniziativa da la SRG SSR)». La Lia Rumantscha è conscienta che sche l'iniziativa vegniss acceptada, avess quai consequenzas gravantas er per Radiotelevisiun Svizra Rumantscha.

Las co-presidentas Urezza Famos e Gianna Luzio han per finir engrazià al secretari general Diego Deplazes per ses grond engaschi. Diego Deplazes vegn a bandunar la Lia Rumantscha en ils proxims mais suenter ch'el ha demissiunà la fin d'october 2022. La proxima radunanza da las delegadas e delegads vegn ad avair lieu ils 28 d'october 2023 a Vella.